

DEN AMBIENTE



POETS

GUS GENSER

"Mi ta biba di musica so!!"

Actualmente ta na Aruba e famoso drummer Arubano Gus Genser. Gus Genser no ta un musico desconoci na Aruba. Gus ta ser concidera como un di e mihor drummer di musica "heavy Rock", den Antias y kisas den Caribe.

Actualmente e ta formando parti c'en un di mihor banda di Rock na Hulanda "THE ZOO". Den aña '79 e tabata forma parti pa e banda "DEPARTURE", despues e la bay pa e banda "MADDOGG". Na aña '80 e la bay toca den varios hotelnan hunto cu musiconan grandi e.o. Pepe Gonzales, Eddie Samsom y Reno Steba. Tambe e tabata toca drummer pa e popular banda "SURVIVELE". Na '86 su

gran amigo Reno Steba cu a bay residencia na Hulanda, a manda buske pa asina nan dos forma parti pa e banda "THE EYE'S". E banda aki tabata un banda cu tabata compaña hopi artistanan famoso e.o., Anita Meyers, Nico Haak y Lee Towers. Tabata dos aña pasa cu Lee Towers cu semper tabata tin un gran aprecio pa su talento riba drums, a recomenda Thijs Van Leer pa contrate pa bay den un gira na Spanja. E gira aki tabata un gira masha exitoso, tocando pa casi tres y cuater mil hende tur anochi den diferente ciudadnan rond di Spanja. Despues di a cosecha hopi fama den e gira aki, e la wordo recomenda na Mark Boon cu net den e tempo ey tabata tin mester di

un drummer profesional pa lanta un banda cu artistanan hopi conoci na Hulanda. E artistanan aki ta musiconan hopi popular na Europa, cu tabata forma parti den gruponan hopi famoso manera, "TIME BANDITS, THE DIESEL". E gruponan aki tabata gruponan cu tabata bay den giranan hunto cu e mundial famoso "rockband THE GRAND FUNK", cu tambe tabata hopi popular y gusta entre e juventud aki na Aruba den epoca di 1970. Formando parti cu e popular musiconan aki nan a batista nan number bao di "THE ZOO". Nan prome meta tabata pa realisa un compact disk, cu nan propio inspiracion y composishonan. No tabata facil pero despues di

hopi sacrificionan, nan a logra di lansa un C.D. riba merkado Hulandes, cual a resulta den un exito rotundo. E C.D. aki a ser graba den un di e mihor studionan di Europa, cual ta esun di Hilversum. Den e studio aki cual ta esun mas acoustiek na Europa, hopi artistanan mundial famoso a yega di haci nan grabacionan, e.o. MICK JAGGER, ELTON JOHN, DIRESTRAITS, DEFF LEPPARD y hopi mas. E ingeniero y producer di e C.D. aki, cual ta Erwin Musper a yega di produci pa artistanan hopi famoso e.o. SCORPIONS, BON JOVI, AEROSMITHS etz. Despues cu e C.D. aki a cuasa hopi furor logrando puestonan hopi halto den e topanan di Hulanda, nan a ser contrata pa bay den un gira Europeo hunto cu e grupo no1 di Hulanda "GOLDEN EARING". Esaki tabata nan meta tambe y nan a logre. Ta hopi grupo na hulanda ta desea pa bay den un gira cu "Golden Earing", cual ta un grupo hopi poderoso na Europa. E gira Europeo hunto cu "GOLDEN EARING" a dura cinco luna. Nan a bishita Alemanía caminda nan a duna presentacion den 12 sitio, na Italia nan a bishita 15 sitio, na Spanja nan a bishita 20 sitio, y na Frankryk 10 sitio. Tur caminda nan a toca den Theater y auditorium pa entre cuater y seiz mil persona. Pa Gus esaki tabata un di su mihor exeperencia den su carera artistico. Tambe Gus a aprecia cu e la wordo invita pa por tabata na Aruba na aña '89, pa compaña e talentoso cantante Arubano Edwin Abath durante Jazz Festival, cu tambe tabata un dushi exeperencia pa su persona. Gus no ta so-

lamente un "rockdrummer", pero tambe un "all around musico". Actualmente su gran amigo Reno Steba tambe ta formando parti di su grupo "THE ZOO", despues cu Michelle de Groot a sali for di e grupo. Reno Steba ta ser concidera mucho mihor cu Michelle de Groot segun e otro intergranenan. E motibo ta cu Reno ta mas sientifico y tambe hunto cu Gus nan ta forma un combinacion di drum y baho hopi solido, pa motibo cu nan tin e mesun sentidonan. Actualmente nan a tuma un "shortbreak", pa despues cuminsa traha riba nan projecto nobo cual ta un C.D., cu ta bay yama "ALONE IN THE HOUSE". Cu e compact disk aki nan tin pensa di yega Inglaterra y tambe riba merkado internacional. Gus ta hopi contento di ta un rato riba su dushi terra, unda cu e la nace y ta orgulloso di por menciona Aruba su number tur caminda cu nan presenta. E tin hopi elegio pa musiconan cu tambe ta drummer, manera Richard Holmond y Robby Luidens cu ta toca dia aden den e mesun rutina. Pasobra no ta facil pa un drummer toca den e mesun ambiente tur anochi, masbien den e mesun lugar. Segun Gus cu e musiconan aki tin un amor increible pa nan arte cual alabes ta nan pan di cada dia. Su deseo ta pa na Aruba lo tin mas interes pa e musiconan hoben, y tambe mas lesnan di muziek moderno e.o. Jazz, funk, rythm and blues y clasiék. DEN AMBIENTE ta desea Gus Genser hopi exito mas cu su exitoso banda "THE ZOO", y cu muy pronto ARUBA por tende mas exitonan grandi di e talentoso drummer internacional ARUBIANO AKI.



Riba grafico saka for di e revista popular na Hulanda "MUZIEK EXPRESS", Mark Boone, Eric Peters, Gus Genser, Michelle de Groot.